

الفصل التاسع عشر

(حانتطسوا على نفسكم من الضحك).. في أول اصطباحة ليا.. في أول يوم عمل على كرسي مكتبي كمدير للصندوق تصادف دخوله عليا.. مين يا خوانا.. ؟ (المقدم مدحت ثابت الكاشف) شاويش السرية لما كنا مستجدين بشورت وفانله وكتنلا بالكليا.. في خريف عام ١٩٧٠..! والذي أخذني عنوة..! لقائد السرية (١٣) آنذاك المقدم محمود سامي شهدي.. لظني هو والعريف عبد الستار والجوهري وممدوح أبو العلا وسيادته أنهم جميعا عساكر بالداخلية..! لأنني كنت التحقت بالكلية لظرف خاص متأخراً يوم الاثنين وليس يوم الجمعة والذي سبقني فيه جميع الطلبة بالدخول واتبهدلوا بهدلة ميري..! أما أنا فأخذوني على كفوف الراحة وقعدوا يجيبولي المهمات من أدوات وملابس ومعدات وسلموها ليا لوحدي في السرية..؟ وكانت معاملتهم رقيقة وإنسانية.. ولم يظهر منهم أي وحشية..! لدرجه حبيبي وتاج راسي الشاويس عبد الستار وحمدي سعد رياض.. قاسولي ولبسوني البيادة في رجلي.. هنا بذكائي الفطري الخارق واللي دايمًا يجيب لي الكافية..؟ تيقنت أنهم شلة عساكر في الجهادية.. فغمزتهم في أيديهم كلهم بخمسين قرش ليبشرقوا أنفسهم.. بس كلهم.. غلابه بقى..! وأنا أحب أكسب ثواب في التعبانين والغلابة والمساكين وبسخاء مين.. والله الشاهد والمكافئ والمعين.. بصيت لقيتهم انقلبوا شياطين.. وأنا ما بحبش كده.. والتقلب في المعاملة.. فين الأصل..؟ وقعدوا

يصرخوا في ودني.. اطرشت.. وينادوا على بعض وهما قصادي
وقصاد بعض.. فاندھشت.. واتترفزت..! إيه يا ابني الجنان
ده أنت وهو.. أنتم مش عارفين أنا مين..؟ أنا الظابط بتاعكم
بعد أربع سنين.. وحافر سيئاتكم أجمعين..! وحاحبسكم كلكم..
ياللي لخيري.. ناكرين..! تاكلوا وتكروا.. وتجروا وتهلوا..! طيب
شوف حاخليكم إيه ليا حاتعملوا..! حاخليكو تمسحوا الأرضية
والبلاط.. بالخيش والسباط.. وأطفحكم الكوتة.. وعيشتكم
حتبقى سودا.. ومش حاتشوفوا شارع ولا شمس أو نهار.. هاتولي
الضابط رئيسكم.. عشان يلمكم ويحاسبكم.. والمعاملة حاتتغير
من الآن وللأبد.. وحاتدموا على رعونتكم وتهوركم.. وتجاوزكم
معايا.. فين الضابط.. (والله ده حصل بالضبط) وماسكين نفسكم
ووشكم وكاتمين خوفكم ورعبكم مني.. أنتم لسه شفتوا حاجة..
لقيت يافطة قائد السرية في آخر الطرقة على اليمين.. تعالوا
ورايا أجمعين.. واللي هايهرب.. حارزعه في الطين.. والغريبة انهم
كانوا ولا مهتمين (يمكن حايكوسوها مع القائد الهمام والمبين..?
مفتكرش..!).. بس لشخصيتي كانوا منبهرين..؟ وذلك بحدسي..
الذي لا يخطئ أغوار المشاعر بالاحترام والود والحنين..! دخلت
على صاحب يافطة المكتب مقدم محمود سامي شهدي.. بعد
إذنيك يا فندم في موضوعين عايز أتكلم مع سيادتكم ضروري
فيهم.. أولا..! حبة العساكر دول.. لا يصلحوا بتاتا..! للعمل في
الداخلية ولازمن يترفدوا النهارده..! ما سك نفسه بالعافية..!

مش عارف ماله هو كمان؟ إيه الحكاية يا جدعان.. قالي:
والموضوع الثاني..؟ اه.. نسوني ولاد الإيه..! عايز مطواة أو
موس أو سكين..؟ ليه كفى الله الشر.. والله الواحد كان داخل
بوابة الكلية سعيد.. بعد ما قابلت الجماعة دوله بقيت عصبي
ونرفز.. وعايز أي حديد.. عشان أفرد نفسييتي القرميد..!
طب يا سيدي عايز المطواة أو الموس أو السكين ليه.. حاقول
لسيادتك بس بعد ما تمشي.. دول (مشاورا عليهم أجمعين وهما
واقفين متحفزين..!) ضروري يمشوا.. أيوة يا فندم عشان حاقول
لسيادتك على سر.. بس يكون بيني وبين سيادتك.. في بير..
طب اتفضلوا أنتم دلوقتي..! يعني إيه اتفضلوا دي..! (إيه الدلع
ده.. يا عيني على الدلال والحنة..؟).. موس ينفع..؟ ماشي
يا فندم..! رocht مسكت جيب بنطلوني اليمين.. وقعدت أشد
طرفه الشمال.. ومشيّت الموس في النص..! انت بتعمل إيه ؟
بييه..! سيادتك اصبر عليا شوية! اتفتح الجيب.. ومعاه الأندر
وير السفلي.. وفتحة بسيطة في الورك.. عشان أنا مبحبش
الصدر..؟ سامي بك شهدي عمال يهرش في دماغه.. والعساكر
بره قلقانين عليه..! وأخيرا طلّعت ال (٦٧جنيها رسوم الكلية)
من جيبي وسلمتها لسيادته.. أنت عملت كده ليه..؟ يا سعادة
البيه ولاد الحرام مخلوش لولاد الحلال حاجة ولا مليم.. وكمان
ضابط شرطة المستقبل لازم يكون حريص وحويط..! وخاصة وأنا
جاي في قطار البضاعة للتوفير.. ولو نعست المصاريف حاتسرق

وتطير..! شوفت يا جدعان..! ! أطول يوم وليلة في التاريخ في ذلك اليوم الذي لا ينسى من القائد ورجاله.. ونعم الرجال.. ونعم المعاملة ونعم الذكرى.. ونعم.. نعيمة الصغير..؟؟ ودي عايضة مقال لوحده من اللي حصل فيا..؟

مدحت بك سألني عن نبذة عن الصندوق ومشروعاته.. بمجرد سؤاله أنا كريت الإجابة في ساعتين.. قاللي أنت بقالك قد إيه في العمل بالصندوق؟.. رديت: النهارده أول يوم عمل ليا..! فوجئت بإغماء سيادته وطلبنا الإسعاف.. أسبوعين مستشفى وأسبوعين في البيت.. وأسبوعين رحلة خارج مصر للترفيه وتغيير جو ومناظر.. عشان ينسى اسمي وصورتى وشكلي.. بالذمة ده جزاء اللي بيشتغل بضمير..؟

كنت جالساً بمكتبي صباحاً لا بيا ولا عليا.. دخل النور والجمال والضياء عليا.. والدي الحبيب الغالي والرائع خلقاً وخلقة وأصلاً وعلامة لينا.. العظيم الخالد اللواء فؤاد بك الصبان.. بعد ما انتهت خدمته بوصول سيادته لسن الستين وكان آخر منصب تولاه سكرتير عام محافظة بور سعيد إبان وجود المحافظ سامي بك خضير.. وكانا عملاقي الداخلية وأي مناصب في الحكم إدارياً.. كانا رجلي دولة بتفرد وامتياز.. وعطاء وإدارة باحتراف..! وقد تعلمت من سيادته الكثير سواء على المستوى الوظيفي ومن قبله على المستوى الاجتماعي..! وكان لي الشرف في زيارته أسرياً في

فيلته المجاوره لفيلة الوزير حسن الألفي بمنطقة السبع عمارات
الراقية بالقرب من سكني بمصر الجديدة.. سيادته شرفني
بالصندوق.. وبدأ دروس الأخلاق في علم تجنب الهروب والنفاق..!
أيوة يا سعدة إيه آخر أخبار الندالة؟.. (كان سيادته قد اشترى
من الصندوق شقتين وتم فتحهم على بعض لاستخدامها عياده
لنجل سيادته النبيل الجميل د. أسامة.. وللعلم نجل سيادته
شريف بك زميلنا ودفعتنا ودائماً ما كان يضحك ساخراً عند
اجتماع دفعتنا في إفطار رمضان سنويا في أحد أندية الشرطة..
عند ملء خانة الوظيفة في استمارات تحديث البيانات.. بقوله
وكتابته موظف عام.. وكان يشغل منصباً هاماً في هيئة سيادية..
وكان ولا زال مصدراً للخير والعطاء والخدمة والانتماء لكل
والصغير قبل الكبير في جميع الطلبات والاحتياجات.. ولا ننسى
فضله وكرمه وأصله كوالده الغالي الفريد والحنين والمحبوب..
بارك الله فيهم جميعاً كأسرة متميزة خيرة أصيلة.. ورحم الله
أمواتنا منهم وصبرهم وصبرنا وألحقهم بالفردوس الأعلى..

فؤاد بك الصبان: إيه آخر أخبار الندالة يا سعيد.. والله يا
فندم.. في السوق رايحة.. وفايقة..

ومنها أشكال وألوان.. وعندنا مشجر كمان.. يرضيك يا
سعيد عشان طلعت عل المعاش يحصل اللي بيحصل معايا.. والله
يا فندم ما عاش اللي يزعل سعادتكم.. وخيركم على الكل.. سواء

بالتقسيط أو كاش..! وأنا تحت أمرك في أي طلب سعادتك تطلبه
مهما كان.. أنت ابني الأصيل الغالي.. وعائز منك كذا وكذا وكذا..
تؤمر يا فندم.. كلها وأكثر منها بإذن الله سيتم إنجازها وإتمامها..
وبالفعل استغرقت مني شهرين وتمت بالكامل من نبي العين..
لأغلى أب وأحن قلب.. وحكى سيادته لي قصة لم ولن أنساها ما
حييت.. كم كنت عظيماً في خلقك وتواضعك.. وكرمك وإسراعك
بنجده الملهوف.. ووقوفك بجوار وفي ظهر المتلوف..! وتطوعك بما
تملكه لغيرك المحتاج والمأزوم.. وكثير من الصفات والعطاء لمن
يستحق وحتى لغيره.. بإذن الله غدا نواصل هذه الحكاية الهامة
ذات عظيم العظة والعبرة.. ودوام الحال من المحال.. وعسى أن
تكرهوا شيئاً وهو خير لكم.. وبالعكس..! .. بإذن الله الجزء
اللي جاي هام.. لو لنا أجل بإذن الله.. وبلاش والنبي تتعكشوا
شعركم.. ولا تجبسوا وشكم.. ولا تحنطوا مناخريكم وودنكم..
لحسن أنا بقيت بخاف منكم.. ومش حاعرف أحكي أي رواية
لكم.. وربنا يريحكم ويرحني منكم.. بالتفاعل والإيجابيه لكم..!
.. ياللي باتعب عشان أسعدكم كلكم.. وانتم خلتوني بأئس وحزين..
عشان قلة تعليقتكم..!؟! ومفيش حنية.. ولا تشجيع منكم..؟ وكله
بثوابه.. وربنا ياخذ حقي منكم..؟

